



Khutba Jummah

HAZRAT MUHYI-UD-DIN AL-KHALIFATULLAH

Munir Ahmad Azim

12 Février 2016 ~
(02 Jamad'ul Awwal 1437 Hijri)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba Jummah lors « Fer Bondié Vine Le But de Ou L'Existence »:

Bane dimounes ki pas assez prévoyants et ki manque discernement, fixé pour zot-même bane différents raisons ou objectifs à zot la vie et zot limite zot seulement à bane objectifs et bane ambitions mondaines. Mais le but ki fine décidé pour l'homme par Allah (twa) fine donné par Allah même, selon So bane propres paroles saints, c'est-à-dire, dans Quran Shareef, kot Li (Allah) dire:

« Mo fine créé dimounes et Jinns pou ki zot reconnaîte et adore Moi. » (Az-Zariyat 51 : 57)

Alors, c'est sa vrai l'objectif d'Allah, pou faire l'homme comprend le but principal de so l'existence lor la terre, c'est-à-dire, kot l'homme bizin complètement dévouer li à Allah. Li clair ki l'homme pas pou capave fixé ene objectif à so propre la vie parski li pas vine dans sa lémonde là par li-même, par so propre volonté, et ni li pou capave quitte sa lémonde là par li-même, par so propre volonté. Li ene créature et Celui ki fine crée li et fine accorde li bane faculté meilleures et supérieures à celui de bane zanimo fine également détermine ene l'objectif à so la vie. Même si nous arrive comprend sa ou non, le but de la création de l'homme li sans aucaine doute l'adoration et la compréhension d'Allah, et pas seulement nous bizin adore Allah et rode conne Allah, mais nous bizin dévouer nous entièrement à Li. Dans ene l'autre place dans Quran Shareef, Allah (twa) fine dire:

« En vérité, vraie religion dans lizié d'Allah, c'est l'Islam... » (Al-Imran 3: 20)

« Alor dévouer to l’attention au service de la religion (comme ene kikaine ki dévoué à Allah). C’est la nature crée par Allah, par quoi Li fine fassonne (créer) bane dimounes. Pas capave ena kit changement dans création d’Allah. C’est la vraie religion. Mais la plupart bane dimounes pas conné. » (Ar-Roum 30: 31).

Religion ki donne nous ene appréciation réelle d’Allah et ki prescrire So vraie l’adoration c’est l’Islam. L’Islam forme partie intégrante de la nature de l’homme et l’homme fine crée en accord avec l’Islam – soumission à ene Dieu Unique – et sa c’est la foi éternelle, véritable la foi. En d’autres mots, Allah fine oulé ki l’homme dévouer li entièrement à So l’adoration, Li oulé ki l’homme content Li et obéir Li par le moyen de tous bane facultés ki Li (Allah) fine donne li. C’est pour sa ki Allah fine investi dans l’homme tous bane facultés ki approprié à l’Islam, pour faire li soumettre à Allah.

Malgré le fait ki l’homme reste occupé par bane différents projets de so la vie, li pas pou capave trouve le vrai bonheur excepté en Allah. Après ki li (l’homme) fine accumule bane grands richesses, après avoir ki li fine occupe bane grands fonctions/positions/travails, après ki li fine vine ene grand commerçant, après avoir ki li fine régner lor ene royaume bien grand, et aussi après ki li fine reconnu comme ene grand philosophe, à la fin li quitte tous sa bane l’engagements là avec bane grands regrets. So lécoeur reproche li constamment ki li fine trop préoccupé li avec bane zaffaires mondaines et so conscience zamais accepté so bane activités illicites (*Haram*) ki rempli avec bane ruses et show (montrer lizié dimounes) ki pas démontrer so vrai nature endans.

Ene dimoune intelligent capave aussi comprendre l’étendu de sa problème là. Nous pas capave attribuer ene l’objectif supérieur, ki bien haute pou atteindre à kitchose au delà de so propre capacité, et kot sa kitchose ou dimoune là pas pou capave fonctionner correctement. Par exemple plus haute fonction d’ene taureau c’est soit labour la terre, labour bane champs, soit dimounes servi li pou faire irrigation de bane champs ou comme transport. So bane facultés pas adapté à aucaine les autres kitchoses. Ainsi, l’objectif de la vie d’ene taureau résume à sa trois fonctions là. Li pas ena la capacité pou faire ene l’autre kitchose. Mais en examinant bane facultés de l’homme et en essayant pou recherche limites de sa bane facultés là, nous alle trouver ki l’homme li en quête d’Allah (twa). Li envie vine tellement dévouer à Allah ki li attribuer tout saki li possédé à Allah. Li partage avec bane les autres zanimalo so instinct naturel de survie. Dans la fabrication certains zanimalo surpasse li. En fait, bane abeilles extraire l’essence de bane différents variétés de fleurs pour produire ene di miel tellement excellent ki dépasse compréhension de l’homme jusqu’à ici. Li clair donc ki sommets de bane facultés de l’homme c’est pou rencontre Allah (twa). Ainsi l’objectif réel de so la vie c’est ki la fenêtr de so lécoeur bizin ouvert à Allah.

La question pou conné couma pou atteindre sa l'objectif là et à travers ki moyens ene dimoune pou trouve Allah capave être soulevé. La toute première étape c'est pou reconnaître Allah Le tout Puissant correctement et pou gagne la foi en Li (Allah), le vrai Dieu. Parski si le premier pas li mauvais ; par exemple, si ene dimoune prend ene oiseau ou ene zanimal, ou zenfant d'ene dimoune comme bondié, alors li pou vine impossible pou li pou suivre le droit chemin dans so quête vers Allah. Le vrai Dieu aide So bane chercheurs mais comment ene bondié ki fine mort pou capave aide bane morts? Dans sa contexte particulier là, Allah, Celui ki possède la Gloire, présente ene excellent illustration de sa dans Quran Shareef:

« Vrai la prière bizin adresse à Li (tout seul). Bane ki zot invoquer à part Li pas faire zot aucaine réponse. Li pareil couma dire kikaine pé étende so deux la main vers dilo espérant ki sa pou vine ziska so la bouche. Zamais li pou réussi. La prière bane ki rejette la foi nek perdi dans vide. » (Ar-Raad 13: 15)

Deuxième moyen c'est pou être conscient de la beauté parfait d'Allah (twa) ; parski lé cœur li naturellement attiré par la beauté, et l'observation de la beauté génère l'amour au niveau lé cœur. La beauté d'Allah c'est So l'Unicité, So Grandeur, So Majesté et So bane les autres attributs, couma indiqué dans Quran Shareef:

« Dieu Li Ene dans So L'Être, So bane attributs et So gloire. Li pas ena aucaine partenaire. Tout dépanne lor Li. Li donne la vie à tous bane particules. Li la source de miséricorde (pitié) pour tout et Li en aucaine façon bizin miséricorde (pitié) de kit ce soit. Li ni ene garçon (pou kikaine), ni Li papa kikaine, parski aucaine être pas égale à Li et personne pas ressemblé Li. » (Al-Ikhlaas 112: 2-5).

Quran Shareef, sans cesse, attire nous attention lor la grandeur d'Allah et li faire nous comprend ki seulement ene tel Bondié pou capave être l'objet de bane désirs de nous lé cœurs et non pas ene kikaine sans la vie et sans pouvoirs.

Troisième moyen pour approche Allah c'est pou gagne la connaissance de So générosité ; parski la beauté et la générosité zot deux kitchoses ki incite à l'amour. Bane attributs généreux d'Allah zot alor résumé dans Surah Al-Fatiha comme suite:

« Tous bane louanges appartenir à Allah, le Maître de tous bane les mondes ; Le Gracieux, Le Miséricordieux ; Maître du Jour du Jugement. » (Al-Fatiha 1: 2-4).

Allah crée So bane serviteurs de nannié ditout, par pure générosité et Li mette à nous disposition So providence, à tout moment. Li (Allah) le soutien de sak kitchose et sak aspé de So générosité manifesté pour So bane créatures. So bonté li sans limites pareil couma Li (Allah) fine affirmé:

« Si zot essaye compter bane bienfaits d'Allah, zamais zot pou capave compte tous sa là. »
(Ibrahim 14: 35)

Quatrième moyen pou accomplir le vrai but de la création c'est la supplication, pareil couma Allah fine dire:

« Et zot Maitre dire : « Fer appel à Moi ; Mo pou exauce zot la prière. Mais bane ki trop arrogant pou adore Moi, pou rentre dans l'Enfer, méprisé ». (Ghafir 40: 61)

« Supplié-Moi, Mo pou réponde zot l'appel. » Allah pé sans cesse appelle nous pou supplier Li afin ki nous zoine Li ; et nous pou capave faire sa, non pas par nous propre capacités mais par le pouvoir d'Allah.

Cinquième moyen c'est pou persévérer pour So cause ; nous bizin cherche Allah en dépensant nous richesse pour So cause, en utilisan tous nous bane facultés pour promouvoir So cause et en servan nous raisonnement pour So cause ; pareil couma Li (Allah) fine dire dans Quran Shareef :

« ... et lutte avec zot bane dibiens et zot propre êtres dans chemin d'Allah... » (At-Tauba 9: 41)

« ... et ki dépense de saki Nous fine fourni zot ». (Al-Baqara 2: 4)

Faire zéffore dans So chemin avec zot richesse et zot la vie et tous zot bane facultés, et de saki Allah fine donne zot comme intelligence, compréhension et talent. Et avant tout, faire le plaisir d'Allah et So paradis vine zot but, et non pas bane attractions temporaires de sa lémonde ici-bas là. *Insha-Allah, Ameen.*